

四

明

叢書

張宗祥



00
2
10

劉容字仲寬其先西寧青海人其父徙于雲京先生幼
穎悟稍長喜讀書中統初以國師薦入侍皇太子于東
宮命專掌庫藏每退直卽詣國子祭酒許魯齋衡魯齋
亦與進之至元十五年立詹事院先生上言曰太子天
下本苟不得端人正士左右輔翼之使傾邪側媚之徒
進必有損令德聞者是之命爲大學司議改祕書監出
爲廣平路總管後以疾卒于官年五十二

元史

魯齋同調

補徵君劉道濟先生德淵

附錄

郝陵川送先生序曰道之不行也非爲佛者小人之相害也由君子之自不行耳道之不競也非止謂君子之不自行也由反倡佛者小人之爲禍耳

又送先生序曰天期不愆屬運而會則結余髮斂余衽高山仰止景行行止其無空老矣若道濟者其誼之高學之正器之遠以大又非余輩之可企也所謂昌揭之士也其興明盛之功也必矣

王秋澗表其墓曰先生性癖直有操守好學能自刻厲

及游滹南王先生門思索辨惑等說自足饜飫史爲專門之業

又曰晚節知圓鑿方枘不能與時阿合乃以所得成就學者言言傳後著之爲書數萬言其說爲天地立極爲生民立本爲聖賢立法

補忠宣張頤齋先生文謙

附錄

至元改元秋詔公行省事中興羌俗素鄙野事無統紀公求蜀士爲人僕隸者得五六人援恩例理而出之俾

通明吏教以案牘旬月之間樞機品式粗若可觀羌人始遣子弟讀書土俗爲之一變

拜大司農卿立諸道勸農司巡行勸課敦本業抑游末設庠序崇孝弟不數年功效昭著野無曠土栽植之利遍天下奏開籍田祭先農先蠶皆自公始尋又奏立國子學以魯齋許公爲祭酒選貴胄子弟教養之所成就人材爲多

晚歲篤于義理之學摳衣魯齋求是正之有自得之趣

以上神道碑

虞道園爲張氏新塋記曰嗚呼微朱子聖賢之言不明于後世微許公朱子之書不著于天下微公則許公之說將不得見進于當時矣庸非天乎

奉訓董先生文忠

董文忠字彥誠真定藁城人仕至僉書樞密院事至元間官奉訓大夫時侍講徒單公履欲行貢舉知上于釋崇教抑禪乘是隙言儒亦有是科書生類教道學類禪上怒已召姚文獻樞及文正與一左相廷辨先生自外入上曰汝日誦四書亦道學者先生曰陛下言士不治

經究心孔孟之道而爲賦詩何關修身何益爲國由是
海內之士稍知從事實學臣今所誦皆孔孟言烏知所
謂道學哉而俗儒守亡國餘習求售己能欲錮其說恐
非陛下上建皇極下修人紀之賴也事爲之止君子以
爲善子羽翼斯文

姚牧庵集

梓材謹案元史先生本傳卒封壽國公諡忠貞元
清河集董氏家傳同惟吳草廬撰先生墓表作正
獻虞道園撰忠獻行狀蘇滋溪撰董士良神道
碑亦並作正獻豈其先諡忠貞後改正獻耶

雪齋學侶

尙書賈先生損之

賈損之

辛先生愿

辛愿字敬之福昌人年二十五始知讀書音義有不通者搜訪百至必通而後已由是博極羣書且善于文辭尤以是非黑白自任家甚貧素負高氣又不能從俗俯仰元光初李獻能元好問在孟津先生往見之獻能爲設美饌先生放箸歎曰平生飽食有數每見吾二弟必得嘉食明日道路中又當與老飢相抗去矣

宋文憲集

附錄

嘗謂王鬱飛伯曰王侯將相世所共嗜者聖人有以得之亦不避得之不以道與夫居之不能行己之志是欲澡其身而伏于廁也此言他人難聞子宜保之其志趣如此

員外元遺山先生好問

別見明道學案補遺

補文憲楊紫陽先生與

雲濠謹案先生遺山集六十卷又
有大興近鐘三卷正統書六十卷

正統八例總序

嗚呼正統之說禍天下後世甚矣恨其說不出乎孔孟

之前得以滋蔓瀾漫而莫知翦遏也通古今考之旣不以逆取爲嫌而又以世系土地爲之重其正乎後之逆取而不憚者陸賈之說倡之莽操祖而誨之也不曰予有慙德不曰武未盡善也以湯武之順天應人而猶以爲未足況爾邪以世系言則禹湯文武與桀紂幽厲並矣不曰賊仁者謂之賊賊義者謂之殘殘賊之人謂之一夫而容並之以土地言則秦之滅六國晉之平吳隋之平陳苻秦之窺伺梁魏周齊之交爭不息者所激也不曰以力假仁者霸霸必有大國以德行仁者王王不

待大湯之七十里文王之百里以王道爲正也王道之所在正統之所在也不然使創者不順其始守者不慎其終抑有以濟夫人主好大喜功之慾必至糜爛其民而後已其爲禍可勝計耶是以矯諸儒之曲說懲歷代之行事蔽以一言總爲八例曰得曰傳曰衰曰復曰興曰陷曰絕曰歸孰爲得若帝摯而後陶唐氏得之夏殷絕而湯武得之是也以秦隋而始年必書曰得何也庶幾乎令其後也未見其甚而絕之私也見其甚而不絕亦私也一世而得再世而傳固也武德貞觀之事旣書

高祖曰得繼之曰太宗得之何也原其心也其心如之
何謂我之功也功著矣奪嫡之罪其能掩乎而曰傳者
誕也悲夫虔化之兵未洗靈武之號又建敗之不正習
亂宜然是故君子惜之此變例之一也孰爲傳曰堯而
舜舜而禹禹而後啓周之成康之類是也曰衰者如
周道衰于幽厲漢政衰于元成之類是也曰復者何如
少康之布德太甲之思庸宣王之修明文武之功之類
是也晉惠中宗則異于是所謂反正者也故附見之此
蔣父之論也惠帝旣復而奪之何也咎其爲賈后所制

至廢其子以成中外之亂德之不剛也德之不剛君道失矣猶中宗改號而韋后與政使武氏之燼復著也曰與者何存之之謂也有必當與者有不得不與者昭烈帝室之胄卒續漢祀必當與者也晉之武帝元魏之孝文不得不與者也昭烈立魏其存乎曰操莽之惡均卻莽而納操誠何心哉黨魏媚晉陳壽不足責也而曰不取于漢取于羣盜之手其獎篡乎魏晉而下訖于梁陳狃于篡弑若有成約今日爲公爲相國明日進爵而王矣今日求九錫明日加天子冕旒稱警蹕矣今日僭卽

皇帝位降其君爲王爲公明日害之而臨于朝堂矣吁
出乎爾者反乎爾其亦弗思矣乎史則書之受禪先儒
則目曰正統訓也哉曰晉不以爲得者何斥其攘魏也
斥而與之何也順生順逆生逆天也天之所假能廢之
哉曰後乎此者不得與斯何也惡之也何惡之惡其長
亂也不然亂臣賊子曷時而已乎公羊曰錄內而略外
舍劉宋取元魏何也痛諸夏之無主也大明之日荒淫
殘忍抑甚矣中國而用夷禮則夷之夷而進于中國則
中國之也且肅宗掃清鉅盜迴軫京闕不曰復而曰興

何也暴其自立也五代而與明宗柴郭何也賢明宗之有王者之言也願天早生聖人是也周祖以其厚民而約已也世宗不死禮樂庶乎可興柰何不假之年而使格天之業隕于垂成也曰陷者何夏之有窮泥漢之有諸呂新室晉之永嘉之禍唐之武韋安史巢溫之僭叛是也始皇十年而從陷例何也曰置秦于大亂不道者始皇也誘始皇于大亂不道者李斯也人主之職在掄一相是年也斯之復相之年也惡惡者疾故揭爲不哲之鑑以著輔相之重也曰景帝卽位之初明帝之永平

八年而書陷者何以短通喪而啟異端也短通喪者滅天性也啟異端者亂天常也雖出承平之令主而不正其失何以嚴後世之戒曰絕者自絕之也桀紂胡亥之類是也曰歸者何以唐虞雖有丹朱商均而謳歌獄訟歸于舜禹桀紂在上而天下臣民之心歸于湯文矣曰漢之建安十三年繫之劉備何也以當陽之役也夫我不絕于民民其絕我乎詩之皇矣乃眷西顧求民之莫斯其旨也商紂之交紂德爾耳悠悠上天不忍孤民之望亟求所以安之而其意常在乎文王之所以潛德言

也曰歸或附之以陷何也示無二君也敢問唐虞之禪
夏后殷周之繼存而不論何也曰聖人筆削之矣起于
周敬王之癸亥何也曰痛聖人既沒微言之不聞也
西周之世書秦之事何也著其漸也秦之僭叛不能制
則周之弱見矣秦人承三代之餘混疆宇而一之師心
自恣絕滅先王典禮而專任執法之吏厲階既作流毒
不已嗚呼王道之不明賞罰之不修久矣然則發天理
之誠律人情之僞舍是孰先焉曰通載者二帝三王致
治之成法桀紂幽厲致亂之已事也曰通議者秦漢六